

22/01/1998

Wanita sanggup korban barang kemas

Rosmin Darus; Hazirah Che Sab

KERELAAN rakyat terutama wanita beberapa negara seperti Korea, Thailand dan Indonesia mendermakan barang kemas mereka untuk membantu memulihkan ekonomi dilihat sebagai pengorbanan yang wajar dicontohi.

Malah kelmarin Perdana Menteri, Datuk Seri Dr Mahathir Mohamad turut meminta wanita negara ini supaya membantu mengatasi masalah modal yang dialami dengan menggunakan barangan kemas mereka tetapi bukan dengan cara menderma kepada kerajaan sebaliknya menjualnya dan menyimpan hasil jualan di dalam bank atau melaburkannya dalam dana tempatan.

Beberapa pihak yang dihubungi memberikan reaksi berbeza berikutan saranan itu tetapi tidak menolak untuk mencontohi sikap rakyat negara jiran itu jika keadaan memaksa.

Kongres Kesatuan Sekerja Kakitangan Awam (Cuepacs) menyambut baik nasihat Perdana Menteri, Datuk Seri Dr Mahathir Mohammad supaya wanita menjual barang kemas dan menyimpan wang hasil jualan di dalam bank atau melaburkannya di dalam dana tempatan.

Presidennya, Abdul Aziz Mohd Sultan, berkata pandangan Dr Mahathir itu boleh memberi kebaikan dari segi ekonomi negara.

"Perdana Menteri bukan memaksa wanita menjual semua barangan kemas mereka, sebaliknya menasihati mereka yang memiliki banyak barang kemas saja supaya menjual dan wang itu disimpan dalam bank atau dilabur dalam dana tempatan.

"Nasihatnya wajar dipandang secara positif demi kebaikan diri dan negara," katanya.

Tambahan pula katanya, pemakaian barangan kemas berlebihan hanya mencacatkan keanggunan wanita.

"Wanita lebih manis jika pakai sedikit saja barangan kemas untuk menaikkan seri," katanya.

Ketua Satu Pertubuhan Tindakan Wanita Islam (Pertiwi), Datuk Zakiah Hanum Abdul Hamid, berkata saranan Perdana Menteri memang patut disokong tetapi wanita mungkin mempunyai agenda sendiri yang menyebabkan mereka suka menghimpun barang kemas.

"Memang sudah menjadi lumrah wanita tidak dapat dipisahkan daripada emas tetapi mungkin mereka ada rancangan sendiri. Mungkin barang kemas itu diwarisi turun-temurun dan hendak ia diwarisi oleh anak dan cucu.

"Tambahan pula, kualiti barang kemas dahulu lebih baik jika dibanding sekarang. Mungkin itu menyebabkan ramai wanita sayang hendak menjualnya sebaliknya disimpan untuk diwarisi oleh keturunannya. Saya sendiri tidak akan menjual atau mendermakan barang kemas turun-temurun saya.

"Bagaimanapun jika ada yang berlebihan, lebih baik dijual dan seperti nasihat Perdana Menteri duit hasil jualan itu disimpan dalam bank atau dilabur dalam dana tempatan, boleh juga membantu memulihkan ekonomi negara," katanya.

Berlainan pula pandangan pensyarah Universiti Kebangsaan Malaysia (UKM), Prof Madya Dr Che Husna Azhari yang menyifatkan emas dan perak sebagai aset tetap yang tidak boleh dispekulasikan oleh mana-mana pihak.

Katanya, jika emas ditukarkan dalam mana-mana mata wang sekalipun ia boleh dispekulasikan dan mungkin akan lebih teruk tetapi jika tetap dalam bentuk emas, ia lebih selamat.

"Emas tidak boleh menyebabkan inflasi tetapi mata wang boleh. Wanita memang berperanan besar membantu kerajaan seperti yang disuarakan oleh Perdana Menteri namun ia bukan melalui penjualan emas tetapi melalui

perbelanjaan berhemat yang mereka lakukan.

"Tambahan pula ekonomi kita jatuh bukan disebabkan oleh jumlah emas yang ada tetapi disebabkan oleh spekulasi mata wang.

"Bagaimanapun secara prinsipnya memanglah sebagai rakyat, kita patut menolong jika keadaan ekonomi semakin meruncing tetapi mungkin cara bantuan yang kita berikan berbeza," katanya.

(END)